



Gerth Mikaelson
Inatsisartunut ilaasortaq
Naleraq

**Inissiat amerlassusii piginnittoqarnerlu pillugu § 37 naapertorlugu
apeqquteqaammut 2025-187-imut akissut**

Dato: 25-11-2025
Sagsnr.: 2025 - 22934
ID. nr.: 78689769

Asasara Gerth

Inatsisartut suleriaasianni § 37 naapertorlugu Inissiat amerlassusii piginnittoqarnerlu pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

1. Nunatsinni inissiat illuinnaallu piffinni tamani qassiunersut kikkunnillu pigineqarnerlut/atorneqarnerlut paaserusuppakka. Soorlu:
 - a. Iserit A/S qassinik inissiaateqarpa? Sumilu?
 - b. Illuut A/S qassinik inissiaateqarpa? Sumilu?
 - c. Kommunit inissiaatai qassiuppat? Sumilu?
 - i. Kommunikkaarlugit paaserusunnarput.
 - d. Inuinnaat qassit illuinnaqarpat? Sumilu?
 - e. Air Greenlandip inissiaatai qassiuppat imalt inissianik qassinnik attartorpa? Sumilu?
 - f. Royal Greenlandip inissiaatai qassiuppat imalt inissianik qassinnik attartorpa? Sumilu?
 - g. Namminersortutik Oqartussat allaffeqarfissuat qassinik inissianik attartorpat? Sumi?
 - h. Tusass inissiaatai qassiuppat imalt inissianik qassinnik attartorpa? Sumilu?
 - i. Staten (Anstalt, Politiit, Domstol) inissiaatai qassiuppat imalt inissianik qassinnik attartorpa? Sumilu?
 - j. Illersornissaqarfik Forsvaret inissiaatai qassiuppat imalt inissianik qassinnik attartorpa? Sumilu?
 - k. Kalaallit Airport qassinik inissianik attartorpa? Sumi?
 - l. Nunaqarfinni illuinnaat qassit inoqarpat? Qassit inoqanngillat? Illumi ilaqutariit qassiuppat?
 - m. Nukissiorfiit inissiaatai qassiuppat imalt inissianik qassinnik attartorpa? Sumilu?
 - n. Peqqinnissamut Aqutsisoqarfik inissiaatai qassiuppat imalt inissianik qassinnik attartorpa? Sumilu?

Akissut: Apeqqutit nassiunneqartut ima iluseqarput annertussuseqarlutillu, tamakkiisumik akissuteqartoqassappat annertuumik nassuiaasiortoqartariaqarluni.

Nassuiaat taamaattoq Inatsisartut suleriaasiannut inatsimmi § 37 naapertorlugu apeqquteqarnissamut sinaakkusiussat avataanniippoq, tak. § 37, imm. 2.

Taamaattumik Naalakkersuisut apeqqutigineqartunut akissuteqarsinnaanngillat.

2. Naalakkersuisut kisitsit taakku tamanit takuneqarsinnaanngorlugit nalunaarsuisalernissamut qanoq pilersaaruteqarpat?

Akissut: Apeqqut Digitaliseeriisarnermut Aqutsisoqarfimmut saqqummiunneqarnikuupput, tassanngaanniillu ilisimatitsissutigineqarpoq:
"Naalakkersuisut maannarpiaq Kalaallit Nunaat tamakkerlugu nalunaarsuivimmik ataatsimoortumik, piginnittoqarnermut attartortoqarnermullu paasissutissartalimmik pilersitsinissamut pilersaaruteqanngillat. Ilisimatitsissutigineqassaaq, sallunaveeqqusiisarnermut nalunaarsuisarneq, taamaalillunilu atuinissamik pisinnaatitaaffeqartarneq (piginnittoqarneq) suliassaqaarfittut angerlaanneqarsimanngimmat.

Naalakkersuisut pisortat ataatsimoorlutik Paasissutissanut Tunngaviusunut Malitassiaat aallaavigalugu paasissutissanik tamanut ammasumik saqqummiussisarfiusoq ingerlappaat: Immikkoortut aalajangersimasut ineriartorneri saqqummiunneqartarnerilu oqartussaaffinnut oqartussaasunit akisussaasuusunit aamma Naalakkersuisunit saqqummiunneqartarput.

Maanna suliani immikkoortut uku atuuttuupput:

- Najugarisanut nalunaarsuiffik – najukkat pisortatigoortut pitsaassutsimikkullu qulakkiikkat.
- Nunaminertanut nalunaarsuiffik
 - nunaminertanut atugassiissutigineqartunut killiliussanullu nalunaarsuiffik
- Inissianut illunullu nalunaarsuiffik – illut inissiallu pillugit paasissutissat tunngaviusut
- Sumiiffiit taaguutaannut nalunaarsuiffik – sumiiffiit taaguutaat nalinginnaanngorsakkat pisortatigoortullu.
- CPR-inut aamma CVR-inut nalunaarsuiffik – innuttaasut kinaassusiinut paasissutissat suliffeqarfiillu pillugit paasissutissat.

Paasissutissanik ingerlatitseqqinnermi suliassaqaarfimmut inatsisit sukkulluunniit atuuttut malinneqartarput, taakkunungalugu paasissutissanik illersuinnermut maleruagassat aamma imikkoortumut inatsisit attuumassutillit ilaatinneqarput."

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga


Aqqaluq B. Egede